

**28 de junh de 2022, Dia Internacionau der Orgullo  
entara Liberacion LGBTI+**

# **DECLARACION INSTITUCIONAU**





Eth dret a caminar peth carrèr sense pòur, sense recéber insults ne patir agressions per èster qui èm o per anar prenudi dera man dera nòsta parelha. Eth dret a qu'eth nòste lòc de trabalh sigue un espaci segur, sense qu'era nòsta orientacion sexuau sigue motiu de discriminacion. Eth dret a exprimir-mos e mostrar-mos tau coma èm en encastre familhau, educatiu o enes espacis d'òci. Eth dret ath reconeishment dera nòsta identitat de genre e dera diuersitat familhau per part des administracions... Toti aguesti drets non son drets qu'agen vengut dadi entà totes es persones. Es collectius LGBTI+ les a calgut lutar pendent decènnis entà artenher-les, tant en nòste país coma pertot deth mon, e encara aué non son pleament garantidi.

Es mobilizacions sociaus en defensa des drets des persones LGBTI+, iniciades damb es hèts de Stonewall er an 1969 en Naua Yòrk e en decènni des setanta en cò nòste, an contribuït a auer un país mès just, mejançant era conscienciacion sociau e er impuls d'un quadre normatiu de proteccion des drets umans. Era Lei 11/2014, deth 10 d'octobre, entà garantir es drets de lesbianes, gais, bisexuaus, transgenres e intersexuaus e entà erradicar era omofòbia, era bifòbia e era transfòbia siguec un punt d'inflexion entà elaborar politiques publiques LGBTI+ en Catalonha, ath madeish temps qu'a permetut atier e acompanyar es persones qu'an vist vulneradi es sòns drets a trauès deth desplegament pertot deth territòri deth Hilat de Servicis d'Atencion Integrau LGBTI+.

Mès recentament, era Lei 19/2020, deth 30 de deseme, d'egalitat de tracte e non-discriminacion refòrce es mesures entà arténher ua proteccion reau e efectiva contra quinsevolha forma o acte de discriminacion o d'intolerància per motiu dera orientacion sexuau, era identitat, o era expression de genre des persones. Era futura lei trans\* catalana, actuaument en elaboracion, deu contunhar eth camin cap ara garantia plea de drets. Damb mès drets, mès justícia, mès democracia. Es nauí drets non rèsten d'auto drets artenhudi ne tanpòc non escafen arren ne arrés.

Hèr a valer es leis d'egalitat en toti es encastres e desplegar-les damb era maxima potència ei ua obligacion de toti es poders publics. E ac ei encara mès aué dia deuant des discorsi d'òdi ara diferéncia e eth qüestionament per part dera extrèma dreita des drets artenhudi. Coma didec Judith Butler per rapòrt a aguesti grops en acte de remesa deth Prèmi Internacionau Catalonha eth 27 d'abriu d'enguan: «Quina vision dera nacion ei aquera que pòt èster menaçada per qui perseguís era egalitat, era libertat, era justícia, era fin des guèrres, un futur sense violéncies, o eth dret a caminar peth carrèr sense pòur?».



En Catalonha tornaram a díder tanti còps coma serà de besonh «Non passaràn!». Mès que jamès, es entitats e es poders publics deth país defeneram eth dret des persones a víuer en libertat, e trabalharam entà accelerar un cambiament social que solament serà possible s'es politiques publiques feministes son transinclusives, s'es politiques LGBTI+ son feministes, e se totes aquestes politiques son tanben antiracistes e tien en compde era edat o era empeditat.

Es drets des persones LGBTI+ son part dera luta compartida pera defensa deth dret de totes es persones a èster e a víuer liures de discriminacions e de violéncies. Ja sigam persones cis, trans\* o non-binàries e sigue quina sigue era nòsta orientacion sexuau, aquesta luta mos a d'interpellar tostemp, pr'amor qu'es drets s'exercissen e se garantissen de manèra collectiva.

## **Supòrt deth Govèrn as reivindicacions des entitats membres deth Conselh Nacionau LGBTI**

Damb motiu deth 28 de junh, Dia Internacionau der Orgulh o entara Liberacion LGBTI+, eth Govèrn dera Generalitat renfortís un an mèz eth sòn compromís damb era defensa des drets des persones LGBTI+ e convida a tota era ciutadanetat a participar des actes e mobilitacions qu'aquesti dies se debanaràn pertot deth territòri damb tot er #Orgulh.

Atau madeish, eth Govèrn recuelh es reivindicacions des entitats membres deth Conselh Nacionau LGBTI, er organ collegiat constituït coma un espaci de participacion ciutadana superior en matèria de drets e déuers des persones LGBTI+ e coma organ consultatiu des administracions catalanes que incidissen en aquest encastre, sens perjudici des funcions e des competéncies d'auti organs o entitats qu'era legislacion establisque.

Aquestes reivindicacions se concrèten en:

— Superar es dificultats qu'encara tròben en Registre Civiú es persones trans\* entath cambiament de nòm o es familhes omoparentaus entath registre de hilhs e hilhes.



- Sollicitar ath Govèrn der Estat de considerar de manera especiau eth dret d'asil e era proteccion des persones LGBTI+ que se tròben en situacions de vulnerabilitat enes païsi d'origina, e d'aqueres que non an pogut accedir ara regularitat administrativa, e qu'era Generalitat age un ròtle decisiu ena acuelhuda de persones LGBTI+ qu'arriben en país, en tot reconéisher es sòns besonhs especifics.
- Contunhar en tot auançar ena formacion especifica deth professorat en matèria de diuersitat e dera realitat LGBTI+, tanben en encastre dera educacion fisica e era practica esportiva, per tau de favorir era creacion d'espacis segurs e de confiança entàs escolans LGBTI+.
- Dotar es Servicis d'Atencion Integrau LGBTI+ (SAI) de mès recorsi e amiar a tèrme campanhes entà hèr a conéisher aguest servici, damb era tòca de melhorar era atencion e er acompanyament qu'aufrissen, atau coma es accions deuant d'ua situacion d'LGBTI-fòbia.
- Garantir eth dret ara reproduccion assistida as hemnes lesbianes e as òmes trans\* e era reduccion des listes de demora en aguest camp. Contunhar damb era descentralizacion deth Servici Transit, damb era creacion progressiva d'un hilat foncionau d'unitats de Transit de referéncia territorial en encastre dera atencion primària e era salut comunitària de Catalonha qu'aten es persones trans\*.
- Melhorar er accès ara informacion des persones deth collectiu LGBTI+ damb empeditat sensoriau o fisica en egalitat de drets.
- Crear e administrar espacis inclusius e segurs entàs persones granes LGBTI+, atau coma fomentar era formacion des persones que trabalhen damb persones granes e deperentes.
- Auer fòrça present eth mon rurau, a on eth nombre de persones deth collectiu LGBTI+ se tròbe mès invisibilizat e dispersat, e contribuir a dispausar d'espacis d'amassada, reforçar es servicis de sosten as collectius e promòir activitats qu'ajuden a visualizar-les dempús dera Administracion mès propèra
- Dispausar d'un avantprojècte de lei trans\* catalana entà que pogue èster debatut e aprobat en Parlament de Catalonha.